

AL-HIKMAH

Jilid	6	ISSN 1985-6822	2014
No.	2		1436

- DIMENSI HAFAZAN DAN RASIONAL DALAM KURSUS WAJIB FAKULTI PENGAJIAN ISLAM UNIVERSITI KEBANGSAAN MALAYSIA ...3-14
Wan Ahsani Fadhilah Wan Mahmud Khairi & Muhamad Faisal Ashaari
- CABARAN DAN POTENSI MAJALAH DAKWAH BERBAHASA MELAYU DI MALAYSIA TERHADAP TREND PEROLEHAN PERBELANJAAN IKLAN (ADEX)...15-28
Shahrul Nazmi Sannusi
- AGENDA HASAN AL-BANNA DALAM PEMBANGUNAN INSAN MENERUSI PENULISAN KARYA *MAJMU'AT AL-RASAIL* ...29-42
Zainudin Hashim & Fakhru Adabi Abdul Kadir
- STRATEGI MODEL PEMBANGUNAN INSAN SEIMBANG PENGAJIAN AGAMA (PISPA) BERDASARKAN TEORI PERUBAHAN SOSIAL IBN KHALDUN DALAM PENGAJIAN AGAMA DI UNIVERSITI KEBANGSAAN MALAYSIA ...43-52
Zaizul Ab. Rahman, Indriaty Ismail & Khaidzir Ismail
- PERLAKSANAAN PROGRAM TAKMIR SEBAGAI MEDIUM PENGIMARAHAN MASJID DI NEGERI SEMBILAN ...53-64
Shuhadak Mahmud & Ibnor Azli Ibrahim
- PENGGUNAAN MODUL DAN BUKU BAHASA ARAB UNTUK ORANG AWAM ...65-77
Suhaila Zailani @ Hj. Ahmad & Nur Afifah Fadzil
- MEMBINA PENGISIAN BERPENGARUH DALAM MEDIA BAHARU MELALUI PENULISAN DAKWAH ...78-90
Ahmad Zahiruddin Mohd Zabidi & Faisal @ Ahmad Faisal Abdul Hamid
- PERLANGGARAN TATASUSILA AGAMA DALAM KALANGAN ANGGOTA POLIS DI IBU PEJABAT POLIS BUKIT AMAN, KUALA LUMPUR ...91-107
Nik Daud Raja Hussein & Rosmawati Mohamad Rasit
- PEMIKIRAN POLITIK DAN KENEGARAAN MUHAMMAD IQBAL .108-118
Abdullah Firdaus, Idris Zakaria & Mohd Nasir Omar
- KEPIMPINAN DALAM KISAH NABI SULAIMAN AS DENGAN HUDHUD ...119-128
Muhammad Amin Hasan, Mohd Azrul Jaafar Ahmad Irdha Mokhtar, Anuar Puteh, Zulkefli Aini & Mohamad Zulkifli Abdul Ghani
- THE REALISATION OF COVERING 'AURAT AMONG THE SUCCESSFUL WOMEN IN MALAYSIA ...129-143
Naemah Hamzah, 'Adawiyah Ismail, Mohd Ismail Mustari & Bushrah Basiron
- THE ROLE OF SHEIKH WAN AHMAD AL-FATANI IN THE MALAY PUBLICATIONS AND PRINTING IN THE MIDDLE EAST ...144-153
Ermy Azziaty Rozali

Al-Hikmah 6(2) 2014: 119-128

Kepimpinan Dalam Kisah Nabi Sulaiman AS Dengan Hudhud

Leadership Skills in the Story of Prophet Sulaiman AS with Hudhud
(hoopoe bird)

MUHAMMAD AMIN HASAN
MOHD AZRUL JAAFAR
AHMAD IRDHA MOKHTAR*
ANUAR PUTEH
ZULKEFLI AINI
MOHAMAD ZULKIFLI ABDUL GHANI

ABSTRAK

Al-Quran telah menampilkan sejumlah tokoh-tokoh tauladan dan tokoh pengajaran agar dijadikan renungan kepada masyarakat. Antaranya kisah Nabi Sulaiman AS dan burung hud-hud yang dirakamkan di dalam surah Al-Naml ayat 20 hingga 28. Kajian ini bermatlamat untuk melihat konsep kepemimpinan dalam kisah Nabi Sulaiman AS dan burung hudhud. Kajian ini menggunakan metodologi kepustakaan dengan membuat analisa dan ulasan terhadap kitab tafsir, buku-buku, artikel jurnal serta penulisan ilmiah yang lain. Hasil kajian mendapati bahawa Nabi Sulaiman AS merupakan seorang tokoh pemimpin yang sangat ideal dan luar biasa. Baginda mampu memikul amanah sebagai Nabi, utusan Allah dan Raja di kalangan umatnya yang tidak mampu dimiliki oleh seseorang pun setelah kewafatan baginda. Justeru, marilah kita tanamkan visi dan misi kehidupan kita sebagai seorang muslim umumnya dan sebagai pemimpin khususnya dengan meneladani kisah ini yang memiliki pengajaran yang sangat relevan sepanjang zaman dengan kehidupan sosial kita.

Kata kunci: *Pemimpin, Tauladan, Al-Quran*

ABSTRACT

Al-Quran has put forward many good example scholars for the people in the community to refer to. One of the interesting stories is about the Prophet Sulaiman with the hoopoe (hudhud) that was captured in surah Al Naml verses 20 to 28. The purpose of this study is to examine the concept of leadership in the story of Prophet Sulaiman and the hoopoe. The study uses document analysis as its method through the analysis of the commentaries of the Al-Quran and from the History book of Prophet Sulaiman himself. The findings showed that Prophet Sulaiman is an ideal and extraordinary leader that could hold the position of trust that was entrusted to him as the Prophet, Allah's

Rasul and King for his people. This inimitable values are not being possessed by others even after his decease.

Keywords: *Leadership, Good example, Al-Quran, Leadership Concept*

PENDAHULUAN

Persoalan kepimpinan dalam Islam merupakan suatu tugas yang amat berat kerana ianya berkait rapat dengan soal tugas sebagai khalifah di muka bumi. Kepimpinan dalam Islam telah bermula sejak terciptanya Adam dan Hawa dan seterusnya apabila Nabi Adam diutus menjadi nabi dan rasul oleh Allah SWT. Semenjak dari itu kepimpinan Islam telah mula berkembang dan terus menjadi tunjang kepada kemajuan tamadun Islam sehingga ke hari ini. Tanggungjawab memimpin dan mengurus sekumpulan individu atau sesuatu masyarakat untuk mencapai objektif atau matlamat terletak kepada bahu pemimpin. Kejayaan dan kemajuan sesuatu bangsa bergantung kuat kepada gaya kepimpinan pemimpin mereka dan berkait rapat dengan kesedaran menunaikan tanggungjawab oleh pemimpin dan seterusnya menggerakkan masyarakat menuju keredhaan Allah. Islam menyediakan garis panduan yang jelas dalam soal kepimpinan yang boleh dipraktikkan untuk kesejahteraan masyarakat. Konsep kepimpinan Islam seperti yang ditampikan di dalam kitab suci Al-Quran dan Sunnah Rasulullah perlu difahami dan diterapkan dalam bentuk yang komprehensif sesuai dengan maksud Islam sebagai cara hidup (*nizamal-hayah*).

KEPIMPINAN MENURUT PERSPEKTIF ISLAM

Terdapat berbagai istilah yang dirujuk kepada kepimpinan dari sudut bahasa, antaranya dalam bahasa arab disebut sebagai *khalifah, imamah, qiyadah, za'mah, ri'ayah, ri'asah dan siyadah*. Dalam Kamus Dewan edisi keempat (2005), perkataan kepimpinan berasal dari kata dasar pimpin yang bererti dibimbing, dipandu, dituntun, ditunjuk dan sebagainya. Apabila perkataan tersebut ditambah awalnya imbuhan ber-pimpin- ia bermaksud berpegangan tangan. Jika ditambah diawalnya imbuhan me-mimpin- ia bermaksud memegang tangan dan membawa berjalan menuju ke sesuatu tempat, mengepalai atau mengetuai serta mengendalikan (badan, pertubuhan, pergerakan, negara dan lain-lain. Manakala jika ditambah diawalnya dengan imbuhan pe-mimpin- ia bermaksud orang yang memimpin.

Dalam bahasa inggeris ia disebut sebagai *leadership*. Dalam *Longman Dictionary of Contemporary English* (1987), *leadership* membawa maksud *the position of leader* (kedudukan pemimpin),

control of power over group (kawalan atau kuasa terhadap sesuatu kumpulan) dan *a group of people who lead* (satu kumpulan manusia yang memimpin).

Menurut Razaleigh (2010), kepimpinan boleh didefinisikan sebagai:

1. Usaha untuk mempengaruhi individu atau sekumpulan individu untuk melakukan sesuatu tugas bagi mencapai objektif tertentu.
2. Tingkah laku individu apabila dia sedang mengarah aktiviti kumpulan ke arah mencapai matlamat yang dikongsi bersama.
3. Seni menyusun hubungan antara individu dengan beberapa kumpulan yang mengarah mereka ke arah sesuatu matlamat yang dirancangkan.

Menurut Fathi Yakan (1988), kepimpinan adalah satu kemahiran berkomunikasi dengan fitrah manusia untuk mempengaruhi dan juga mengarah manusia ke arah mencapai matlamat dengan cara memastikan kepatuhan, kepercayaan dan penghormatan.

Berdasarkan pentakrifan yang diberikan jelas bahawa pemimpin secara umumnya boleh dikatakan sebagai satu istilah yang ditujukan kepada seseorang yang bertindak mengetuai atau mengepalai memimpin sesuatu masyarakat, kumpulan, badan, pergerakan dan sebagainya untuk mencapai matlamat kumpulan atau organisasi yang dipimpin.

NABI SULAIMAN AS DALAM AL-QURAN

Menurut Muhammad Ali (2012) nama Nabi Sulaiman AS disebutkan di dalam al-Quran sebanyak enam belas kali dalam surah *Al-Baqarah*, *Al-Nisa*, *Al-Naml*, *Saba'* dan *Shaad*. Baginda merupakan salah seorang nabi Bani Israil yang dianugerahkan oleh Allah SWT berupa kenabian dan kerajaan.

Menurut Mohammad Ali Imran (2011), di antara limpahan nikmat yang telah dikurniakan Allah SWT kepada Nabi Sulaiman AS yang termaktub di dalam Al-Quran adalah seperti berikut:

1. Dikurniakan kebijaksanaan dan ilmu sejak usia muda.
2. Memahami bahasa pertuturan burung dan bahasa haiwan.
3. Mewarisi kerajaan ayah baginda, Nabi Daud AS.
4. Mempunyai angkatan tentera terdiri dari kalangan jin, manusia dan haiwan.
5. Jin dan syaitan tunduk kepadanya dengan melaksanakan sesuatu yang tidak mampu dilakukan oleh manusia seperti membina tembok-tembok besar, istana-istana yang tinggi, pemandangan dan perhiasan yang indah.

6. Angin tunduk mengikut perintahnya dengan berhembus dalam masa yang singkat ke mana sahaja yang dikehendaki.
7. Kekuatan mencairkan tembaga sehingga boleh dibentuk apa sahaja yang diinginkan.

KISAH NABI SULAIMAN AS DAN HUDHUD

Kisah ini dirakamkan di dalam surah Al-Naml ayat 20 hingga 28 supaya ia menjadi pengajaran kepada manusia. Kisah mengenai sebuah kerajaan yang tidak akan dimiliki oleh seseorang pun setelah kewafatan Nabi Allah Sulaiman AS.

Firman Allah SWT:

وَتَفَقَّدَ الظَّيْرَ فَقَالَ مَا لِيَ لَا أَرَى الْهُدْهَدَ أَمْ كَانَ مِنَ الْغَائِبِينَ ﴿٢٠﴾ لَأُعَذِّبَنَّهُ عَذَابًا شَدِيدًا أَوْ لَأَذْبَحَنَّهُ أَوْ لِيَأْتِيَنِي بِسُلْطٰنٍ مُّبِينٍ ﴿٢١﴾ فَمَكَتْ غَيْرَ بَعِيدٍ فَقَالَ أَحَطْتُ بِمَا لَمْ تُحِطْ بِهِ وَحِجَّتِكَ مِنْ سَبِيلِ بَنِي يَاقِينَ ﴿٢٢﴾ إِنِّي وَجَدْتُ أَمْرًا تَمْلِكُهُمْ وَأُوتِيَتْ مِنْ كُلِّ شَيْءٍ وَلَهَا عَرْشٌ عَظِيمٌ ﴿٢٣﴾ وَجَدْتُهُمْ وَقَوْمَهَا يَسْجُدُونَ لِلشَّمْسِ مِنْ دُونِ اللَّهِ وَرَتَيْنَ لَهُمُ الشَّيْطٰنُ أَعْمٰلَهُمْ فَصَدَّهُمْ عَنِ السَّبِيلِ فَهُمْ لَا يَهْتَدُونَ ﴿٢٤﴾ أَلَا يَسْجُدُوا لِلَّهِ الَّذِي يُخْرِجُ الْخَبَاءَ فِي السَّمٰوٰتِ وَالْأَرْضِ وَيَعْلَمُ مَا تُخْفُونَ وَمَا تُعْلِنُونَ ﴿٢٥﴾ اللَّهُ لَا إِلَهَ إِلَّا هُوَ رَبُّ الْعَرْشِ الْعَظِيمِ ﴿٢٦﴾ قَالَ سَنَنْظُرُ أَصَدَقْتَ أَمْ كُنْتَ مِنَ الْكٰذِبِينَ ﴿٢٧﴾ أَذْهَبَ بِكَيْتَابِي هَذَا فَأَلْفِيهِ إِلَيْهِمْ ثُمَّ تَوَلَّى عَنْهُمْ فَانظُرْ مَاذَا يَرْجِعُونَ ﴿٢٨﴾

Maksudnya: “Dan dia memeriksa burung-burung lalu berkata: Mengapa aku tidak melihat hudhud, apakah dia termasuk bersama yang tidak hadir? (20) Aku benar-benar akan mengazabnya dengan azab yang keras atau benar-benar menyembelihnya kecuali jika benar-benar dia datang kepadaku dengan alasan yang terang (21) Maka tidak lama kemudian (datanglah hudhud), lalu dia berkata: Aku Telah mengetahui sesuatu yang kamu belum mengetahuinya; dan aku bawa kepadamu dari negeri Saba suatu berita penting yang diyakini (22) Sesungguhnya aku menjumpai seorang wanita yang memerintah mereka, dan dia dianugerahi segala sesuatu serta mempunyai singgahsana yang besar (23) Aku mendapati dia dan kaumnya menyembah matahari, selain Allah; dan syaitan telah menjadikan mereka memandang indah perbuatan-perbuatan mereka lalu menghalangi mereka dari jalan (Allah), sehingga mereka tidak dapat petunjuk. (24) Agar mereka tidak menyembah Allah yang mengeluarkan yang terpendam di langit dan di bumi, yang mengetahui yang kamu sembunyikan dan apa yang kamu nyatakan. (25) Allah, tiada Tuhan yang disembah kecuali Dia, Tuhan yang mempunyai ‘Arsy yang besar. (26) Berkata Sulaiman: Akan kami

lihat, apakah kamu benar, ataukah kamu termasuk orang-orang yang berdusta? (27) Pergilah dengan (membawa) suratku ini, lalu jatuhkan kepada mereka, Kemudian berpalinglah dari mereka, lalu perhatikanlah apa yang mereka bicarakan (28).

Secara ringkasnya ayat ini menceritakan pada satu ketika, Nabi Sulaiman AS mengumpulkan seluruh pengikut-pengikutnya dan memeriksa mereka baik dari kalangan manusia, jin dan haiwan. Sesudah diteliti, ternyata burung hudhud didapati tidak hadir sehingga menyebabkan raja mereka, Nabi Sulaiman AS murka kepada hudhud dan bertekad akan menyembelihnya sebagai hukuman. Tidak lama kemudian, hudhud datang menghadap baginda raja dengan penuh pengaduan, menjelaskan sebab-musabab keterlewatannya menghadiri majlis perhimpunan yang diwajibkan oleh baginda AS.

Hudhud menjelaskan kepada baginda bahawa dia terserempak dengan seorang wanita bernama Balqis, seorang ratu kerajaan Saba' yang memiliki singgahsana yang besar, tetapi malangnya ratu tersebut tidak beriman dan tunduk kepada Allah SWT. Pengaduan hudhud diterima oleh baginda nabi Sulaiman AS, lantas baginda mengarahkan hudhud untuk menyiasat perkara itu dan membawa surat perutusan dari baginda. Diringkaskan di sini bahawa hudhud adalah seekor makhluk kecil yang memiliki kepekaan dan prihatin terhadap peristiwa yang berlaku di sekelilingnya.

CIRI-CIRI KEPIMPINAN NABI SULAIMAN AS DI DALAM KISAH INI

1. Keprihatinan yang tinggi

Tindakan Nabi Sulaiman memeriksa burung hudhud ini menggambarkan rasa keprihatinan yang tinggi seorang pemimpin terhadap pengikutnya. Menurut Sayyid Qutb (2000) dalam tafsirnya *Fi Zilal al-Quran*, tindakan Nabi Sulaiman AS memeriksa burung hudhud ini menggambarkan sifat-sifat *syakhsiyah* beliau, iaitu sifat waspada, teliti dan tegas. Baginda tidak pernah lupa, lalai atau mengabaikan mana-mana perajuritnya yang menghilangkan diri dari angkatan bala tenteranya yang amat besar itu, yang terdiri daripada golongan jin, manusia dan burung-burung yang diatur dalam barisan yang padu supaya mereka tidak berpecah belah dan menyeleweng.

Seseorang pemimpin atau ketua seharusnya peka dan prihatin terhadap orang bawahannya seperti memperhatikan siapa yang tidak hadir dalam setiap pertemuan dan kegiatan yang diadakan. Ini kerana ia merupakan tanggungjawab yang mesti dilakukannya sebagaimana

seorang imam memerhatikan kehadiran para makmumnya. Berkata Umar Al-Khattab RA: “Selidiklah sahabatmu di waktu solat. Jikalau mereka tidak hadir kerana sakit, engkau jenguklah. Dan sekiranya dalam keadaan sihat- sihat sahaja maka patutlah untuk dicela”.

Nabi Sulaiman AS juga mengajarkan kepada bakal pemimpin negara supaya tidak meremehkan perkara kecil, kerana seringkali sesuatu yang besar bermula dari awalnya nampak kecil. Perkara seumpama ini tentu tidak akan terjadi kecuali dalam kehidupan para nabi dan orang-orang yang beriman. Mereka merasa takut dan bimbang kerana semua perkara tersebut akan dipertanggungjawabkan dihadapan Allah SWT. Masalah kepemimpinan adalah masalah yang sangat besar dan berat.

2. Ketegasan

Seseorang pemimpin perlu menzahirkan ketegasannya sekiranya didapati mereka yang di bawah kepimpinannya melakukan kesalahan atau sesuatu yang bertentangan dengan arahan yang diberikan sepertimana yang dilakukan oleh Nabi Sulaiman AS. Menurut Sayyid Qutb (2000) dalam kisah Nabi Sulaiman AS ini, burung hudhud dengan jelas tidak hadir tanpa kebenaran setelah baginda sendiri melakukan pemeriksaan. Tindakan yang tegas perlu diambil supaya tidak berlaku keadaan yang kucar-kacir dan menjadi contoh teladan yang tidak baik kepada perajurit-perajurit yang lain. Oleh sebab itu, kita dapati raja Sulaiman AS yang tegas itu terus mengancam perajurit-perajurit yang tidak hadir dan melanggar disiplin itu dengan katanya seperti yang termaktub di dalam ayat 21 di atas.

Akan tetapi Nabi Sulaiman bukanlah seorang raja yang zalim di bumi ini, malah baginda seorang nabi. Baginda belum lagi mendengar alasan burung hudhud yang menghilangkan diri itu. Oleh sebab itu, baginda tidak mengambil sesuatu keputusan yang muktamad terhadap hudhud sebelum mendengar sendiri alasan dan sebab-sebab keuzurannya tidak hadir.

3. Keadilan

Menurut Sayyid Qutb (2000), keadilan Nabi Sulaiman jelas terserlah apabila baginda berkata “...atau dia (burung hudhud) membawa alasan yang terang kepadaku” iaitu mengemukakan hujah yang kuat yang membuktikan keuzurannya yang dapat melepaskan dirinya daripada dikenakan hukuman di atas kesalahan yang dilakukan. Baginda sentiasa berlaku adil, tidak terburu-buru menjatuhkan hukuman dan tidak pernah menghukum sebelum mendengar alasannya. Seseorang pemimpin juga perlu membuat penyelidikan dan pemerhatian secara adil dan saksama sebelum membuat sebarang keputusan. Ini kerana

mungkin orang yang tidak hadir itu mempunyai alasan, atau orang yang melakukan dosa itu kerana terpaksa sehingga dia boleh dilepaskan daripada dikenakan sebarang hukuman.

4. Keterbukaan

Menurut Dr. Muhammad Ali Al-Shalabi (2001), Nabi Sulaiman AS berlapang dada dalam mendengar alasan yang dikemukakan oleh burung hudhud berkenaan keterlewatannya. Baginda tidak memotong, mengherdik dan mendustakan apa yang sedang diperkatakan oleh hudhud. Bahkan berita tersebut merupakan suatu kejutan kepada baginda. Baginda juga tidak terburu-buru menerima dan mendustakan apa yang diceritakan hudhud kepadanya seperti kata baginda "...akan kami lihat, apakah kamu benar atau kamu termasuk di kalangan orang-orang yang berdusta?"

Menurut Zulkiple Abd Ghani (1999), sikap keterbukaan pemimpin seumpama ini amatlah penting kerana ia boleh mencipta suasana yang harmoni di antara pemimpin dengan para pengikut dan mewujudkan perasaan kasih sayang antara mereka. Oleh sebab itu, Islam mengajar supaya para pemimpin tidak menganggap dirinya mempunyai keistimewaan-keistimewaan tertentu yang membezakan dirinya dengan para pengikutnya. Di sisi Allah, ukuran perbezaan di antara manusia adalah ketakwaan mereka, bukannya kedudukan dan kemewahan harta benda.

5. Kerendahan hati (tawadu')

Menurut Dr. Muhammad Ali Al-Shalabi (2001), Nabi Sulaiman AS sentiasa berada dalam keadaan *tawadu'* meskipun baginda berada di puncak kejayaan dan kekuasaan sehingga dikatakan bahawa baginda sering berjalan dalam keadaan menundukkan kepala kerana khusyuk kepada Allah.

KELEBIHAN DAN PERANAN HUDHUD

Burung hudhud merupakan sejenis spesies burung yang dapat mengetahui adanya air tersimpan di dalam bumi walaupun kelihatan di luarnya kering. Oleh sebab itu, beberapa orang ahli tafsir mengatakan bahawa Nabi Sulaiman AS sangat memerlukan burung hudhud itu dalam perjalanan untuk memberi petunjuk di mana adanya air. Ia juga memiliki paruh yang tajam sehingga dapat menembus batang pokok untuk dijadikannya sebagai sarang tempat berlindung. Kepalanya

berjambul dan mengeluarkan bunyi yang pendek bukan seperti burung murai (Hamka 1978).

Keistimewaan yang dimiliki oleh hudhud adalah taat kepada pemimpin dan dahagakan maklumat. Walaupun hudhud menyedari kelewatan bertemu Nabi Sulaiman AS, ia tetap hadir dengan membawa amanah untuk dihadapkan kepada pemimpinnya. Keterlewatan hudhud bukan alasan untuk ia tidak hadir bertemu Nabi Sulaiman AS. Ini menunjukkan Hudhud memiliki sifat berani biar pun hukuman yang bakal diterima kepadanya terlalu berat perlu ditanggung jika tidak mempunyai alasan yang kukuh.

Sekali imbas ancaman yang dituturkan oleh Nabi Sulaiman AS kepada hudhud tersebut adalah amat menggerunkan. Tetapi sambungan ayat selanjutnya menyerlahkan sisi lain yang walaupun disampaikan dalam keadaan murka, namun rasional masih menguasai diri Nabi Sulaiman AS, "...Kecuali jika dia datang kepadaku dengan alasan yang jelas".

Apa yang benar, hudhud tidak terbang ke negeri Saba' untuk bersiar-siar, makan angin atau pun melanggar prinsip-prinsip umum seperti mengabaikan perintah pemimpin dan sebagainya, sebaliknya hudhud terbang dan kembali ke perbarisan Nabi Sulaiman AS. Kelewatan Hudhud adalah kerana ingin mendapatkan maklumat berkaitan keadaan politik di negeri Saba'. Misi yang dibawanya juga adalah misi yang besar, iaitu misi mentauhidkan umat manusia, bukannya misi-misi berbentuk sekunder seperti masalah *khilafiyah*, permusuhan peribadi dan tuduh-menuduh, tetapi misi menyelamatkan manusia dari menjadi 'parasit' kekufuran.

Namun, tindakan hudhud pula janganlah dijadikan alasan untuk bersikap tidak *wala'* kepada pimpinan, iaitu wabak hilang kawalan dan emosional, atau watak mengutamakan pendapat sendiri berbanding keputusan pimpinan dalam melakukan gerak kerja jemaah sehingga tidak selari dengan dasar dan matlamat gerakan Islam.

Kisah ini tidak seharusnya dijadikan sandaran dalil kepada aktivis gerakan Islam untuk buat 'kepala sendiri' atau ingin berperanan sebagai hudhud sahaja, iaitu mahu meninjau 'kawasan' sahaja tanpa melakukan kerja lain.

Hudhud tetap meletakkan ketaatan kepada Nabi Sulaiman kerana ketaatan kepada pemimpin adalah perkara dasar (*thawabit*) dalam berjemaah, bukan mengabaikannya. Sikap yang ditunjukkan hudhud juga memperlihatkan bahawa seorang perajurit Islam mestilah memiliki kepekaan terhadap amanah, sikap mengkaji dan teliti, bersemangat untuk menyedarkan kaum walaupun dengan kemampuan dan peranan yang kecil.

Penjelasan hudhud mengenai sebuah kerajaan yang telah menyembah selain daripada Allah SWT menunjukkan bahawa hudhud

adalah seekor makhluk kecil yang memiliki kepekaan dan prihatin terhadap peristiwa yang berlaku di sekelilingnya. Dia bukan sekadar hanya melihat kepada tugas khasnya sahaja bahkan melihat kepada matlamat utama di bawah pemerintahan baginda nabi AS yang mengajak manusia daripada menyembah makhluk kepada menyembah pencipta makhluk.

PENUTUP

Masyarakat yang cemerlang terbentuk dari kepimpinan yang cemerlang. Semakin ramai pemimpin yang memahami kepimpinan sebagai suatu amanah, maka akan semakin makmur dan sejahteralah sesebuah masyarakat. Kalau pemimpin diminta melaksanakan urusan kepimpinan dengan penuh amanah dan dedikasi, maka Islam juga meminta para pengikut melaksanakan tugas mereka kepada pemimpin. Justeru, marilah kita tanamkan visi dan misi kehidupan kita sebagai seorang muslim umumnya dan sebagai pemimpin khususnya dengan meneladani kisah ini yang memiliki pengajaran yang sangat relevan sepanjang zaman dengan kehidupan sosial kita.

RUJUKAN

Al-Qur'an.

Abdul Malik Bin Abdul Karim (Hamka). 1978. *Tafsir Al-Azhar Juzu' XIX*. Surabaya: Yayasan Latimojong.

Ali Muhammad Ash-Shalabi. 2006. *Fikih Kemenangan & Kejayaan*. Terj. H.Samson Rahman. Jakarta: PustakaAl-Kautsar.

Fathi Yakan. 1988. *Musykilat al-Da'wah wa al-Da'iyah*. Berut: Muassasah-Risalah.

Kamus Dewan. 2005. Edisi Keempat. Kuala Lumpur: Dewan Bahasa Dan Pustaka.

Longman Dictionary of Contemporary English. 1987. Great Britain: Richard Clay Ltd.

Mohamad Ali Imran. 2011. *25 Kisah Kenabian Para Anbiya'*. Selangor: Pustaka AlEhsan.

Muhammad Ali Ashabuuni. 2012. *Lembaran Kisah Nabi Ulul Azmi Dan 25 Para Rasul*. Terj: Abu Ahlayani Fathi. Selangor: Pustaka Ilmuan.

Razaleigh Muhamat. 2010. *Kepimpinan Dan Pengurusan Islam: Sejarah Teori Dan Pelaksanaan*. Bangi: Fakulti Pengajian Islam, Universiti KebangsaanMalaysia.

Sayid Qutb. 2000. *Tafsir Fi Zilalil Qur'an*. Terj. Yusoff Zaky Haji Yacob. Kelantan: Pustaka Aman Press Sdn.Bhd.

Zulkiple Abd Ghani & Ahmad Ridzuan (pnyt.). 1999. *Kepimpinan Dakwah Dan Politik Islam*. Bangi: Fakulti Pengajian Islam, Universiti Kebangsaan Malaysia.

*Ahmad Irdha Mokhtar
Jabatan Pengajian Dakwah Dan Kepimpinan,
Fakulti Pengajian Islam,
Universiti Kebangsaan Malaysia.
Mel-e: irdha@ukm.edu.my